

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1969 del 02/07/2026

De mossnemm ist zaruckdatiert, van kinder as augòngen sai' oder adoptiart kemmen sai' no der earste to van genner 2026

Augea'paitrog ver en dritte kinn, va de 15 van heibeger vòngen u' de vrong

[Mòcheno] Va de 15 van heibeger as kimm p bartz moglech sai' vourstelln de vrog ver en augea'paitrog austellt va de Autonome Provinz va Trea't ver de familie bou as augeat oder adoptiart kimm s dritte kinn. S moss bart se austoaln pet an paitrog fisset gem en de zait va zeichen jor, no en birtschòflege kondizion va de familia ont an praispaitrog ver za giltn s bider zaruck gea' ont plaim af de òrbet ver de mame.

“Gem an augea'paitrog bill song tschbinnen en de zukunft van Trentin, en de familie ont en sozial van inser gamoa'schòft. Petn doi moss de Provinz bill hèlven ber as tschèrlt za hom kinder, pet an untermitt as tauert a lònge zait”, sok der president Maurizio Fugatti.

“ Der paitrog ver en dritte kinn - sok nou derzua der vicepresident ont assessor en birtschòftverpesser, en de òrbet, en de familia, en de universitet ont en de untersuach Achille Spinelli - henk u' a paitroghilf ont gip bèrt en de òrbet van baiber. Nemmen en de sicherhilf ver zeichen jor, hom ber tschbinnen a hilf ver de mame as bider zaruck gea' za òrbetn oder as plaim en de bèltòrbet, bavai ber tschbinnen as augea', òrbet ont s guat plaim van familie bòcksn zòmm. De leistn bècksln u'ganommen va de Junta gea' en de richtung za verlaichtern ont verlengern de zaitn ver za stelln vour de vrog ont gem de moglechkait za meing sa vourstelln online aa”.

Ber mu' vrong

Der paitrog kimm gem en de familie as en de Provinz va Trea't lem ont bou as augeat oder adoptiart kimm a drittes kinn. De mama miast hom de rèchtn ver de stòttkear ont va residenz, patschrim asn provinzialgasetz, ont miast toalmòchen va de glaiche familia van kinder.

Zbischn de rèchtn ist patschrim as de mama miast hom an òrbet en moment as augeat oder adoptiart kimm s kinn, oder as de hòt innzolt de previdenzialpaitroger ver mindestn zbelf jor en de leistn vinf jor. De moss ist zaruckdatiert, ver de kinder as augòngen oder adoptiart sai' no en earste to van genner 2026.

Fissetn toal ont praistoal

S toal ist ònderst no en de birtschòftlege kondizion va de familia no en ICEF Familia:

finz as 48.000 euro, (400 euro as mu'net) ver de familie pet ICEF finz as 0,40;

finz as 30.000 euro (250 euro as mu'net) ver de familie pet ICEF iber 0,40 ont finz 0,70;

ver de familie pet ICEF iber 0,70 oder a'ne ICEF, kriak men 30.000 euro, auszolt pet 250 euro as mu'net, as kimm garèchtn ver en IRPEF.

Der paitrog kimm gem van mu'net no as augòngen ist oder adoptiart kemmen ist s kinn finz as hòt zeichen jor.

Ver de mame as, no en dritte jor va lem van kinn, gea' bider oder plaim af de òrbet, aa benn de an aigenen bèrk u'vòngen, hom s rècht za kriang 200 euro òll mu'net va mear. Ver za krinags miast men hom gaòrbetet ver en gònz 180 ta en jor vouraus va de vrog, aa benns nèt noch ont noch.

Abia vourstelln de vrog

Derno as sai' kemmen u' ganommen de bècksln va de Provinzaljunta pet mossnemm va de 25 van moi, de vrog ver en fisset toal ont aa ver en praispaitrog mu kemmen vourstellt direkt va de mama durch en SPID oder Elèktronesche Erkennkòrt (CIE), oder durch de patronatn as sai' as de provinz. De zait va vourstell ist kemmen galenkert finz as 180 ta va benn as ausòngen ist oder adoptiart ist kemmen s kinn. Ver haier sai' gilte **de derbailregln ver en 2026**: ver de kinder augòngen oder adoptiart vour as de 30 van prochet 2026 de vrog ver en fisset paitrog mu kemmen vourstellt finz as de 31 van schantònderer 2026, pet en rècht za krieg der paitrog ver de gònze zait.

Men kònn vinnen òndra nochrìcht as de sait: [Augea' paitrog ver en dritte kinn](#)

Ibersetz gamòcht van Sprochtirl va de Tolgamoas'chèft Hoa Valzegu' ont Bersntol

(cdt)